



Bublin Mehmed je rođen 1939. godine u Sarajevu. Studirao je i diplomirao na Građevinskom fakultetu u Sarajevu 1963. godine. Magistrirao je na Građevinskom fakultetu u Sarajevu, a doktorirao na Arhitektonskom fakultetu u Sarajevu.

Profesor je na Građevinskom fakultetu u Sarajevu, a bio je gostujući profesor na Fakultetu za saobraćaj i komunikacije u Sarajevu. U proteklom periodu je obavljao nastavničku djelatnost i na Arhitektonskom, Šumarskom i Poljoprivrednom fakultetu u Sarajevu.

U period od 1966. do 1972. je bio zaposlen u Preduzeću za ceste i u Željeznicama BiH. U periodu od 1972. do 1978. godine bio je angažovan na poslovima urbanizma i komunalnih djelatnosti u općini Centar i Skupštini grada Sarajeva.

Od 1978. do 1996. Radio je u Institutu za arhitekturu, urbanizam i prostorno planiranje Arhitektonskog fakulteta u Sarajevu, a od 1996. do 2015. na Građevinskom fakultetu u Sarajevu, kada je penzionisan i izabran za profesora emeritusa Univerziteta u Sarajevu.

Predsjednik društva urbanista Bosne i Hercegovine bio je u periodu 1980 – 1990. i 1996 – 2005. godine. U periodu 1990 – 2002. godine obavljao je funkciju direktora Instituta za arhitekturu, urbanizam i prostorno planiranje Sarajevo.

U svom dugogodišnjem radu učestvovao je u izradi preko četrdeset prostornih planova općina, tri prostorna plana regija (kantona) i četiri plana posebnih područja, te desetak urbanističkih planova gradova, a bio je i koordinator izrade Prvog prostornog plana Bosne i Hercegovine. Autor je preko pedeset naučnih i stručnih radova iz oblasti prostornog razvoja i saobraćaja. Takođe je učestvovao u organizaciji velikog broja okruglih stolova, simpozija i konferencija, koji su se odnosili na teritorijalni i urbani razvoj Bosne i Hercegovine i razvoj saobraćaja.

U javnosti je istupao putem medija o pitanjima razvoja Bosne i Hercegovine i razvoja saobraćaja.



Knjige koje je objavio su :

Knjiga **Gradovi Bosne i Hercegovine Milenijum razvoja i godine urbicida** u kojoj je zabilježeno uništavanje gradova Bosne i Hercegovine u periodu 1992-1995 kao i geneza njihovog hiljadugodišnjeg razvoja. Knjiga je objavljena na bosanskom i engleskom jeziku.

Knjiga **Sarajevo u Historiji od neolitskog naselja do metropolisa** sadrži cjelovit urbani razvoj grada sa osnovnim smjernicama za budući razvoj. Knjiga je objavljena u izdanju na bosanskom jeziku, a posebno na engleskom.

Knjiga **Bosna tragovi postojanja i uništavanja** sadrži razvoj Bosne kroz historiju pretežno kroz kulturni, urban, religijski i privredni razvoj od prvih pisanih tragova o Bosni do savremenog doba. Knjiga je objavljena na bosanskom jeziku.

Prošireno izdanje knjige **Bosna tragovi postojanja i uništavanja** objavljena je u dvojezičnom izdanju na bosanskom i engleskom jeziku.

Knjiga **Održivi razvoj BiH** tretirala je raspoložive kapitale i to prirodne, stvorene, kapitale u ljudima i njihovim vještinama, moralne i kulturne kapitale, kao i mogućnosti njihovih korištenja na održivim osnovama. Knjiga je objavljena na bosanskom jeziku.

Najnovija knjiga objavljena je pod naslovom **Sarajevo grad budućnosti**, koja tretira prošlost, sadašnjost i budućnost grada Sarajeva kao evropske metropole. Knjiga je objavljena na bosanskom jeziku.

Knjiga **Jugoslavija-epohalna ostvarenja i memorija zaborava** bavi se pitanjima neprolaznim vrijednostima bivše socijalističke Jugoslavije vezanih za antifašizam, borbu protiv nacionalizma, oslanjanje na vlastite snage u razvoju i epohalna ostvarenja u izgradnji zemlje, memorijama antifašističke borbe i memorijom zaborava od strane novostvorenih država na tlu bivše Jugoslavije. Knjiga je objavljena na bosanskom jeziku.



Knjiga **Rehabilitacija gradova Bosne i Hercegovine** tretirala je sveobuhvatne probleme rehabilitacije gradova bazirane na savremenim principima. Knjiga je objavljena na bosanskom jeziku.

Iz oblasti prostornog planiranja i zaštite okoline objavljene su knjige: **Prostorno planiranje na bosanskom jeziku, Saobraćaj i prostor** na bosanskom jeziku, **Prostorno planiranje i zaštita okoline** na bosanskom jeziku, **Budućnost grada s prirodom i njihovim urbanim tehnologijama** na bosanskom jeziku i engleskom jeziku.

Ove knjige su objavljene kao univerzitetski udžbenici i koriste se u nastavnom procesu.

Iz oblasti saobraćaja kao udžbenici objavljene su knjige na bosanskom jeziku i to: **Saobraćaj u stambenom naselju, Saobraćajna ekonomija, Funkcionalne karakteristike saobraćaja, Planiranje saobraćaja i saobraćajnica, autocesta na koridu V-c.**

Sva objavljena djela mogu se pronaći u nacionalnoj biblioteci, neka djela na internetu, kao i u javnim bibliotekama fakulteta (Građevinskom i Arhitektonskom) kao i muzejima i institutima.